

ԿԱՐԳ

ՄԱՍՆԱԳԻՏԱԿԱՆ ԿՐԹՈՒԹՅԱՆ ԵՎ ՈՒՍՈՒՑՄԱՆ ԾՐԱԳՐՈՎ
ԱՇԽԱՏԱՆՔԻ ՎՐԱ ՀԻՄՆՎԱԾ ՈՒՍՈՒՄՆԱՌՈՒԹՅԱՆ ՇՐՋԱ-
ՆԱԿՈՒՄ ԳՈՐԾՆԱԿԱՆ ԱՇԽԱՏԱՆՔԱՅԻՆ ՈՒՍՈՒՑՈՒՄ ԱՆՑՆՈՂ
ԵՎ ՈՐՈՇԱԿԻ ԱՇԽԱՏԱՆՔ ԿԱՏԱՐՈՂ ՏԱՄՆՎԵՑԻՑ ՄԻՆԶԵՎ
ՏԱՄՆՈՒԹ ՏԱՐԵԿԱՆ ԱՆՁԱՆՑ՝ ԱԼԿՈՀՈԼԱՅԻՆ ԽՄԻՉՔՆԵՐԻ
ԱՐՏԱԴՐՈՒԹՅԱՆ ՄԵՋ, ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՄԴՐՈՒԹՅԱՄԲ ՍԱՀՄԱՆՎԱԾ ԾԱՆՐ, ՎՆԱՍԱԿԱՐ, ԱՌԱՋ-
ՆԱՊԵՍ ԾԱՆՐ, ԱՌԱՋՆԱՊԵՍ ՎՆԱՍԱԿԱՐ ԱՇԽԱՏԱՆՔՆԵՐՈՒՄ,
ԻՆՉՊԵՍ ՆԱԵՎ ՄԻՆԶԵՎ ՏԱՄՆՈՒԹ ՏԱՐԵԿԱՆ ԱՆՁԱՆՑ ՀԱՄԱՐ
ԾԱՆՐ ԵՎ ՎՆԱՍԱԿԱՐ ՀԱՄԱՐՎՈՂ ԱՇԽԱՏԱՆՔՆԵՐՈՒՄ ՆԵՐԳՐԱ-
ՎԵԼՈՒ, ՆՐԱՆՑ ԱՌՈՂՋՈՒԹՅՈՒՆԸ, ԱՆՎՏԱՆԳՈՒԹՅՈՒՆԸ ԵՎ
ԲԱՐՈՅԱԿԱՆՈՒԹՅՈՒՆԸ ՊԱՀՊԱՆԵԼՈՒ ՊԱՅՄԱՆՆԵՐԸ
ՍԱՀՄԱՆԵԼՈՒ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում են «Մասնագիտական կրթության և ուսուցման մասին» օրենքին համապատասխան մասնագիտական կրթության և ուսուցման ծրագրով աշխատանքի վրա հիմնված ուսումնառության շրջանակում գործնական աշխատանքային ուսուցում անցնող և Հայաստանի Հանրապետության աշխատանքային օրենսգրքի 101.1-ին հոդվածով նախատեսված աշխատանքային պայմանագրի հիման վրա որոշակի աշխատանք կատարող տասնվեցից մինչև տասնութ տարեկան անձանց՝ Հայաստանի Հանրապետության աշխատանքային օրենսգրքի 257-րդ հոդվածի 3-րդ և 4-րդ մասերին համապատասխան ակոնհոլային խմիչքների արտադրության մեջ, Հայաստանի Հանրապետության օրենսդրությամբ սահմանված ծանր, վնասակար, առանձնապես ծանր, առանձնապես վնասակար աշխատանքներում, ինչպես նաև մինչև տասնութ տարեկան անձանց համար ծանր և վնասակար համարվող

աշխատանքներում (այսուհետ՝ սույն կարգի 1-ին կետով նախատեսված աշխատանքներ) ներգրավելու, նրանց առողջությունը, անվտանգությունը և բարոյականությունը պահպանելու պայմանները:

2. ՍՈՒՅՆ ԿԱՐԳԻ 1-ԻՆ ԿԵՏՈՎ ՆԱԽԱՏԵՍՎԱԾ ԱՇԽԱՏԱՆՔՆԵՐՈՒՄ ՆԵՐԳՐԱՎԵԼՈՒ ՊԱՅՄԱՆՆԵՐԸ

2. Մինչև սույն կարգի 1-ին կետով նախատեսված աշխատանքներում ներգրավումը՝ ուսանողն ուսումնական հաստատության միջոցների հաշվին անցնում է բժշկական զննություն, եթե գործատուի հետ կնքված պայմանագրով բժշկական զննությունը չի իրականացվում գործատուի միջոցների հաշվին:

3. Աշկերտին աշխատանքի ներգրավելուց առաջ գործատուն և մասնագիտական ուսումնական հաստատությունը պետք է խորհրդակցեն և համագործակցեն միմյանց հետ՝ գնահատելու համար աշխատանքային գործունեությամբ պայմանավորված աշկերտի կյանքին և առողջությանը (այդ թվում՝ ֆիզիկական և մտավոր զարգացմանը) սպառնացող ռիսկերը և ձեռնարկեն անհրաժեշտ միջոցներ դրանք կանխարգելելու և նվազագույնի հասցնելու ուղղությամբ: Աշխատանքի վրա հիմնված ուսուցման կազմակերպման վերաբերյալ համագործակցության շրջանակը սահմանող պայմանագրով գործատուն մասնագիտական ուսումնական հաստատությանը տրամադրում է սույն կարգի 5-րդ կետով նախատեսված տեղեկատվությունը:

4. Աշկերտին հանձնարարվող աշխատանքներում պետք է հաշվի առնվի աշկերտի տարիքը, ֆիզիկական և մտավոր հասունության մակարդակը, անվտանգության մասին տեղեկացվածության և աշխատանքային փորձառության պակասը:

5. Նախքան աշխատանքի ներգրավելը գործատուն պարտավոր է աշկերտին և նրա օրինական ներկայացուցչին ծանոթացնել սույն կարգին, տրամադրել տեղեկատվություն աշկերտի աշխատանքային պարտականությունների մասին, այդ թվում՝ ծանր, վնասակար, առանձնապես ծանր, առանձնապես վնասակար, ինչպես նաև մինչև տասնութ տարեկան անձանց համար ծանր և

վնասակար համարվող հանձնարարվելիք կոնկրետ աշխատանքների վերաբերյալ, աշխատանքային պարտականություններով պայմանավորված՝ արտադրական և սպասարկման ոլորտի օբյեկտներում տեխնածին վթարների, արտադրական պատահարների և դրանց հետևանքների, դրանցից պաշտպանվածության համար ձեռնարկվելիք միջոցառումների մասին: Տեղեկատվության տրամադրումը հավաստվում է աշկերտի և նրա օրինական ներկայացուցչի ստորագրությամբ կազմվող գրավոր փաստաթղթով, որի մեկ օրինակը պահվում է գործատուի մոտ, իսկ մյուսը տրամադրվում է աշկերտին (նրա օրինական ներկայացուցչին):

6. Աշկերտի աշխատանքը պետք է իրականացվի ոլորտում մասնագիտական բավարար գիտելիքներ և փորձ ունեցող չափահաս անձի (մասնագիտական ուսուցման հրահանգչի) հսկողության ներքո, որը նշանակվում է գործատուի կողմից:

7. Մինչև աշխատանքն սկսելը գործատուն աշկերտին տրամադրում է անվտանգ աշխատանքային գործունեության վերաբերյալ տեղեկություններ, անցկացնում ուսուցում և հրահանգավորում՝ արտադրական սարքավորումներից անվտանգ օգտվելու կանոնների, տեխնածին վթարների, ինչպես նաև արտադրությունում օգտագործվող վտանգավոր քիմիական նյութերի հետ աշխատելու կանոնների, աշխատանքային գործունեությանն առնչվող այլ հնարավոր ռիսկերի, դրանց կանխարգելման և պատահարների դեպքում՝ պատշաճ վարքագիծ դրսևորելու համար: Ուսուցումն ու հրահանգավորումը կրկնվում են պարբերաբար՝ վեց ամիսը մեկ անգամ:

8. Աշկերտի անվտանգության և առողջության պաշտպանության հարցերում տեղեկատվություն տրամադրելու, ինչպես նաև միջոցառումների պլանավորման, իրականացման և մշտադիտարկման համար գործատուն կարող է ներգրավել բժիշկ, աշխատողների անվտանգության ապահովման և առողջության պահպանման ծառայություն կամ մասնագետ:

9. Աշկերտի առողջության պահպանման և անվտանգությունն ապահովելու համար գործատուն, օրենսդրությամբ և իր ներքին իրավական ակտերով

սահմանված կարգով, պարտավոր է ապահովել աշխատանքի նորմալ պայմաններ, այդ թվում՝

1) աշխատանքի կատարման համար անհրաժեշտ նյութերի և գործիքների պատշաճ որակ և դրանք ժամանակին տրամադրել.

2) առողջության համար աշխատանքի անվտանգ և անվնաս պայմաններ (անվտանգության տեխնիկայի նորմերի և կանոնների պահպանումը, պատշաճ լուսավորությունը, ջեռուցումը, օդափոխությունը, սահմանված նվազագույն նորմաներից ցածր աղմուկը, ճառագայթումը, վիբրացիան և աշխատողի առողջության համար բացասական ներգործություն ունեցող վտանգավոր այլ գործոններ).

3) հաշմանդամություն ունեցող անձանց համար խելամիտ հարմարեցումներ.

4) անհատական պաշտպանության միջոցներ.

5) զգեստափոխվելու, հագուստը, կոշիկները, անհատական պաշտպանության միջոցները պահպանելու համար սանիտարական և անձնական հիգիենայի սենյակներ կամ համապատասխան առանձնացված տարածքներ՝ լվացարաններով, ցնցուղարաններով և զուգարաններով.

6) հասանելի և անարգել արտակարգ ելքեր՝ անհրաժեշտ նշաններով և լուսավորությամբ.

7) հրդեհաշիջման միջոցներ, առաջին օգնության փաթեթներ և ազդանշանային համակարգեր՝ պատշաճ հրահանգներով.

8) վտանգավոր տարածքներում մանրամասն տեղեկատվական նշաններ՝ հնարավոր ռիսկերի և անհրաժեշտ նախազգուշական միջոցների նկարագրությամբ:

10. Եթե աշխատանքի վրա հիմնված ուսումնառության շրջանակում աշկերտը ներգրավվում է ակոհոլային խմիչքների արտադրության մեջ, նա չի կարող իրականացնել ակոհոլային խմիչքների համտես, իսկ գործատուն պետք է աշկերտին զերծ պահի աշխատավայրում ակոհոլային խմիչքների սպառումից:

11. Գործատուն պարտավոր է զերծ պահել աշկերտին նրա առողջությանը, անվտանգությանը և բարոյականությանը վտանգող աշխատանքային միջավայրից, ապահովել հարգալից և աջակցող աշխատանքային մթնոլորտ:

12. Գործատուն պետք է աշխատավայրի՝ աշկերտի համար տեսանելի վայրում փակցնի սույն կարգը, աշկերտի աշխատանքի և հանգստի ռեժիմը, հանգստի կամ սնվելու համար, լրացուցիչ և հատուկ ընդմիջումները, ինչպես նաև իրավասու վերահսկող մարմնի գտնվելու վայրը և հեռախոսահամարը:

13. Աշխատանքի վայրում կամ աշխատանքային գործառույթները կատարելիս այլ վայրում աշկերտի կյանքի կամ առողջության հետ կապված ցանկացած դժբախտ պատահարի կամ մասնագիտական հիվանդության մասին գործատուն պետք է անհապաղ հաղորդի մասնագիտական ուսումնական հաստատությանը:

14. Մասնագիտական ուսումնական հաստատությունները վարում են սույն կարգի 1-ին կետով նախատեսված աշխատանքներում ներգրավված աշկերտների վիճակագրություն, որը տեղեկատվություն է պարունակում աշխատանքի բնույթի, աշխատանքներն սկսելու և ավարտելու ժամկետների վերաբերյալ:

15. Մասնագիտական ուսումնական հաստատությունը, գործատուի հետ համաձայնեցված ժամանակացույցով, սակայն ոչ պակաս, քան կիսամյակի ընթացքում առնվազն երկու անգամ այցելելում է գործատուին՝ հսկելու գործնական աշխատանքային ուսուցման ընթացքը և դրա համապատասխանությունն ուսումնառության վերջնարդյունքներին:

16. Մասնագիտական ուսումնական հաստատությունը կրթության պետական կառավարման լիազոր մարմնին անհապաղ տեղեկացնում է աշկերտի աշխատանքի հետ կապված դժբախտ դեպքերի կամ մասնագիտական հիվանդությունների վերաբերյալ:

17. Կրթության պետական կառավարման լիազոր մարմնին իրականացնում է սույն կարգի 1-ին կետով նախատեսված աշխատանքներում ներգրավման արդյունավետության գնահատում, աշկերտի աշխատանքի հետ կապված արձանագրված պատահարների մշտադիտարկում և ստացված տվյալները հաշվի է առնում մասնագիտական կրթական ծրագրի տվյալ մակարդակի յուրաքանչյուր որակավորման շրջանակային նկարագիրը կամ մասնագիտական

կրթության համապատասխան որակավորման պետական կրթական չափորոշիչները մշակելիս և դրանք փոփոխելիս:

18. Սույն կարգի պահպանման վերահսկողությունն իրականացնում է Հայաստանի Հանրապետության առողջապահական և աշխատանքի ոլորտի տեսչական մարմինը՝ օրենսդրությամբ սահմանված կարգով: Եթե վերահսկողության արդյունքում տեսչական մարմինը գտնում է, որ աշկերտի կողմից իրականացվող աշխատանքն իր բնույթով այնպիսին է, որ վտանգում է նրա առողջությունը (այդ թվում՝ ֆիզիկական և մտավոր զարգացումը), բարոյականությունը կամ սպառնում է նրա անվտանգությանը, համապատասխանաբար ծանուցում է կրթության պետական կառավարման լիազոր մարմնին և համապատասխան մասնագիտական ուսումնական հաստատությանը, որպեսզի վերջիններս ձեռնարկեն իրենց իրավասությունից բխող անհրաժեշտ միջոցառումներ:

19. Սույն կարգով սահմանվող հարաբերությունների շրջանակում նախատեսված պահանջները գործատուի կողմից խախտվելու դեպքում վերջինս ենթակա է պատասխանատվության Վարչական իրավախախտումների վերաբերյալ օրենսգրքով սահմանված կարգով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ